



PAHAYAGAN SANG PARTIDO KOMUNISTA SANG PILIPINAS ★ ISLA SANG NEGROS

ANG Paghimakas

GINAUBAYAN SANG MARXISMO-LENINISMO-MAOISMO MARSO 2023

Paslawon ang dalagkuan kag singki nga ataki sang kaaway!

Komiteng Rehiyunal sang Partido sa Isla sang Negros

Marso 29, 2023



ANG KOMITENG REHIYUNAL SANG PARTIDO Komunista sa Pilipinas sa Isla sang Negros (KRN) nagapaabot sang isa ka mahimayaon nga rebolusyonaryo kag militante nga pagpanamyaw sa mga Pulang kumander kag hangaway idalum sa Apolinario Gatmaitan Command sang Bag-o nga Hangaway sang Banwa (AGC-BHB) sa Negros, sa mga rebolusyonaryong masa sa mga organisasyong masa kag organo sa gahum pampulitika, kag mga alyado sang BHB sa ika-54 nga anibersaryo sang makasaysayan nga pagkatukod sini. Ang BHB nga nagsugod lang sa 60 ka hangaway nga

may siyam ka matag-as nga kalibre nga armas sa ikaduha nga distrito sa Tarlac sang gintukod ini sadtong Marso 29, 1969 nahimo na nga pungsodnon nga rebolusyonaryong Hukbo sang pumuluyo. Nakapundar ini sang sobra 110 ka larangan gerilya sa 74 ka probinsya sa 85 ka probinsya sa Pilipinas. Nagapaslaw ini sa tanan nga kontrarebolusyonaryo nga giyera nga ginsunsar sang nagbulos-bulos nga mga rehimen sang reaksyonaryo nga nagahari nga sahi sang dalagku nga burgesyia komprador kag agalon mayduta.

Aton nga dayawon sa isa ka

mahimayaon nga pagselebrar ang aton dungganon nga mga kadalagan sa padayon nga pagpasulong sa pungsodnon demokratiko nga rebolusyon paagi sa pangmalawigon nga inaway banwa bisan pa sa nagalala nga pasismo kag pagkabarbaro sang reaksyonaryo kag pasista nga mga nagahari nga sahi.

Sa isla sang Negros, ang kalig-on sang BHB napanday sa tunga sang pinakatiranikal kag barbaro nga kontrarebolusyonaryo nga giyera sang nagbulos-bulos nga mga reaksyonaryong nagahari nga rehimen kag sa subong nga rehimen US-Marcos II. Ini nga kontrarebolusyonaryo nga giyera nagapa-

ngapin sa mahimuslanon kag mapiguson nga malakolonyal kag malapyudal nga sistema sang mga dalagku nga agalon mayduta-asyendero, komprador kag dalagku nga burukrata sa isla. Padayon nga ginaguba sini ang kabuhi sang pumuluyong Negrosanon. Wala sang untat ang pag-agas sang dugo

halin sa lawas sang mga martir nga rebolusyonaryo, mga mangu-nguma kag mamumugon sa uma. Ang makamamatay nga kontra-insurhensya nga kampanya sa pag-ensirkulo kag pag-ipit sang pasis-tang militar pareho nga nagatar-get sa mga hangaway sang BHB kag mga sibilyan.

Sila Romeo Nanta, Jeren Vargas, Flor Ceballos, Kerima Lorena Tariman, Ericson Acosta, Marilyn Badayos, Cheene Dacalos, Virgilio Tamban, Rodolfo Leo John Asucena, Arjen Mahinay, Ricky Altariba, Andre Cose kag madamu pa nga mga kaupod ang nangin rebolusyonaryo nga baganihan kag martir halin sa lain-lain nga mga larangan gerilya sa Negros. Ang ila mga pangalan dugang sa mataas na nga listahan sang mga rebolusyonaryong martir kag baganihan sa Negros nga naghalad sang ila kabuhi para sa rebolusyon sugod sang rebolusyonaryong paghimakas sa isla sa tunga-tunga sang dekada '70 tubtob subong. Nagadugang sila sa kalayo sang determinasyon kag militansya sang mga rebolusyonaryong pwera para sa tayuyon nga pag-abanse sa pungsodnon demokratiko nga rebolusyon kag paglab-ot sa pungsodnon nga kahilwayan, matuod nga demokrasya kag hustisya sosyal. Aton sila pasidunggan kag himuon nga maayo nga ehemplo ang ila kabuhi.



Ang sandigan nga mga prinsipyo kag husto nga linya sa pagsulong

Sadtong tunga-tunga nga bahin sang dekada '70 kag dekada '80, sa pagdaba-daba sang sosyo-ekonomiko nga krisis sang malakolonyal kag mala-pyudal nga sistema sang pungsod, nagsingki ang rebolusyonaryong paghimakas sang pumuluyong Pilipino kag dasig nga nagsulong ang pungsodnon demokratiko nga rebolusyon paagi sa pangmalawigon nga inaway banwa.

Mapagsik nga nagsulong ang pinakamalapad kag pinakamabaskog nga rebolusyonaryong armadong paghimakas kag ang ligal demokratiko nga kahublagan sang pumuluyong Negrosanon idalum sa pagpamuno sang Partido Komunista sa Pilipinas (PKP) sa isla sa Negros para mag-amot sa pagpasingki sa rebolusyonaryong paghimakas agud lab-uton ang pungsodnon nga kahilwayan kag matuod nga demokrasya.

sodnon nga kahilwayan kag matuod nga demokrasya.

Tuman ka dasig nga nagdaku ang dungganon nga kusog sang rebolusyonaryong kahublagan. Sustenido nga nakalunsad ang BHB sang mga anihilatibo nga taktikal nga opensiba, nakapundar sang malapad nga baseng masa nga naka-impluwensya sa dos-tersia sang pumuluyo sa bilog

MARSO 2023



ANG **Paghimakas**



angpaghimakas@protonmail.com



negrosrevportal.wordpress.com

Nagapasalamat ang *Ang Paghimakas* sa mga kontribusyon agud mangin madinalag-on ang ini nga isyu. Sa pagpauswag sang aton *Ang Paghimakas*, ginapangabay sa tanan nga bumalasa nga padayon nga mag-amot sang mga balita, piktyur, istorya kag iban pa nga sinulat. Nagapangayo man kami sang inyo mga suhestyon kag komentaryo paano pa gid ini pauswagon.

nga isla kag nakatukod sang mga organo sang gahum pampolitika sa malapad nga kaumhan. Nagbaskog ang agraryong rebolusyon ilabina sa mga interyor kag intermedya nga lugar bangud lig-on ang mga organisasyong masa kag may presensya sang BHB. Ang mga dalagku nga agalon mayduta napilitan nga biyaan ang ila mga kadutaan sa amu nga mga lugar.

Sa pinakabaskog nga pagsulong, naglupad palayo sa kama-tuoran ang pamensaron sang mga “wala” nga oportunistang ara pa sa sulod sa Partido. Nagdamgo sila sang dalagku nga mga tikang nga lampas sa aktwal nga masarangan kag naglihis sa sandigan nga mga prinsipyo sang Partido.

Nagtuhaw ang mga pagduda sa kahustuhon sang malakolonyal kag malapyudal nga analisis sa naghari nga sistema sang pungsod kag sa estratehiya sang pangmalawigon nga inaway banwa. Nasilaw ang pila ka kadre sa mga dalagku nga imprastrukturang proyekto ni Marcos. Ginhapag ang mga ideya nga malakapitalista na ang Pilipinas kag indi na santo ang estratehiya sang pangmalawigon nga inaway banwa; nga mas santo ang insureksyong lungsod sa pagpati nga signipikante nga naggamay ang populasyon sang mga mangunguma kag mas nagdamu ang isip sang mga mamumugon. Base sa sini nga pagpati,

gindisinyo sa Negros ang “*war front strategy*”—nga ang tanan nga patag sang paghimakas mga teatro sang gyera.

Ginpa-init ang urban kag mga sentro nga banwa sa mga ispekta-kular nga bira sang mga partisano. Nagsulod sa wala sa panahon nga regularisasyon ang BHB paagi sa pagtukod sang mga absoluto nga konsentradong mga platun, kumpanya kag isa ka batalyon. Ang ini nga mga absoluto nga konsentradong mga pormasyon budlay isusteni kag nahamulag sa masa. Sa pinakasandigan, adbenturismo kag “wala” nga oportunismo ang mga ini.

Indi nadugayan, sa mga tuig 1988 pataas, nadulaan sang inis-yatiba sa pagpakig-away ang absoluto nga konsentradong mga pormasyon tubtob nagresulta sa mga kapaslawan, pag-atras kag pagpanghina sa rebolusyonaryo nga armadong kahublagaan. Halos mawasak ini sadtong 1993 sang mag-isplit sa lawas sang Partido ang bilog nga KRN. Sa sulsol ni Arturo Tabara, wala nagsunod ang KRN sa desisyon sang ika-10 nga plenum sang Komite Sentral sang PKP nga paglunsar sang kahublagaan panadlong kag pag-balik sa mga sandigan nga prinsipyo sang Partido nga naka-ukit sa mga dokumento sang Unang Kongreso sang Partido sadtong Disyembre 26, 1968.

Sang 1993, naagyan ang daku nga kahalitan sa mga rebolusyonaryong pwersa sa isla sa Negros sang nagsipak ang KRN sa pagpamuno ni Tabara kag ni Etabag sa PKP kag gingiit ang ila sayop nga linya. Nadala man nila ang sobra 400 ka katapoan sang BHB sa ila mga sayop nga pamensaron kag tikang. Gintukod nila ang gagmay nga grupo nga ang pinakadaku ang Rebolusyonaryong Partido ng Manggagawang Pilipino (RPMP). Ila man gintukod ang ila armado nga grupo, ang Revolutionary Proletarian Army (RPA). Nangin lubos nga mga rebisyunistang traydor ang mga isplitista. Ang Alex Bongcayao Brigade (ABB) ni Nilo dela Cruz sa Manila nakigtipon sa RPA kag nangin RPA-ABB ang armadong grupo sang mga rebisyunistang traydor sa isla sang Negros.

Ang mga plano kag tikang sang mga rebisyunistang traydor mas pagsabotahe sa pagsulong sang rebolusyonaryo nga armadong kahublagaan sa isla. Nangin lubos nga kontrarebolusyonaryo ang mga rebisyunistang traydor sang nagsurender sila sa rehimen Estrada sadtong tuig 2000 kag nakigbuligay sa reaksyunaryong Armed Forces of the Philippines (AFP) sa ila kontra-insurensya nga mga pakana batok sa rebolusyonaryong kahublagaan.

Ang IDKP sa isla sang Negros

Sa tunga sang pagsipak sang mga rebisyunistang traydor, may 70 ka elemento sang BHB sa Central Negros ang nagpahayag sang panindugan sa sandigan nga prinsipyo sang Partido kag pag-upod sa Ikaduha nga Dungganan nga Kahublagaan Panadlong (IDKP), amu man ang mga kadre kag katapoan sang Regional Mass Movement Commission (RMMC) kag Partisan Front Committee (PFC) sa urban. Sila ang nangin

inisyal nga base sang Probisyunal nga Komiteng Tagpatuman (PKT)—ang pamunoan sang Partido sa isla nga ginbulos sa nagsipak nga KRN.

Sa paglunsar sa IDKP sa isla sang Negros sugod 1994, gintibong liwat ang pulitikal nga linya nga pungsodnon demokratikong rebolusyon paagi sa pangmalawigon nga inaway banwa. Liwat nga gin-uyatan ang estratehikong linya nga palibutan ang mga

syudad halin sa kaumhan. Ginathag liwat nga ang armadong paghimakas ang prinsipal nga porma para sa pagpundar sa pulitikal nga kusog sang mga rebolusyonaryong pwersa kag sa pag-agaw sa gahum pampolitika. Naathag kag gintadlong ang mga sayop nga linya sang insureksyonismo, adbenturismong militar paagi sa wala sa panahon nga regularisasyon sa Pulang hukbo, kag parlyamentarismo bilang mga

laragway sa “wala” kag tuo nga oportunistang linya sa pulitika. Ang pagtib-ong liwat sa husto nga linyang pampulitika nagtungtong sa pag-athag kag pag-uyat liwat sa husto nga pag-analisa sa katingban Pilipino nga malakolonyal kag malapyudal.

Nangin mas masanagon ang IDKP sang PKP sang diri natipon ang nagdepek nga si BGen. Raymond Jarque halin sa reaksyonaryong AFP sadtong 1996. Suno kay anay BGen. Jarque sa iya pagdepek sa BHB, “garok tubtub sa ubod” ang naghari nga reaksyonaryong sistema sa Pilipinas. Ang ini nga depeksyon pakadto sa rebolusyonaryong kahublagan naka-impluwensya sa pagdepek sang isa ka tim sang mga Citizen Armed Force Geographical Unit (CAFGU) nga may dala nga tatlo ka matag-as nga kalibre nga armas kag pagka-organisa sang Negros Paramilitary Veterans Association ukon NPvA nga nagapartisipar sa ligal nga demokratikong kahublagan masa kag nagaduso sang ila demokratiko nga kinamatarung kag mga demanda.

Dululungan sa paglunsar sang IDKP, ginpaidalum sa reoryentasyon, redipinasyon sa mga tahas kag redeployment ang BHB. Gintukod gilayon ang Probisyonang Komite sa Distrito nga nag-

base sa tatlo ka barangay sa Guihulngan, Negros Oriental. May ara ini sang *undersized* nga platon nga sentro de grabidad (SDG) nga nagahulag sa limitadong radyus. Ara sa palibot ang apat ka iskwad nga naghulag kag nagpatuman sa hilikuton masa sa mas malapad nga radyus. Gilayon ginhatagan sang atensyon ang pagpundar liwat sa mga larangan gerilya bilang mga base sa paglunsar sa lapnagon kag sunson nga inaway gerilya base sa nagalapad kag nagadalum nga baseng masa.

Sa tuig 1997, ang ginpadala nga isa ka iskwad sang BHB para sa hilikuton rekoberi kag pagpundar liwat sang larangan gerilya sa erya sang Binalbagan, Himamaylan, kag Kabankalan, Negros Occidental kag Tayasan kag Jimalalud, Negros Oriental nangin sobra platon kadakuon pag-abot sang 1999. Ang isa ka seksyon kadakuon nga yunit sang BHB nga ginpadala sa Canlaon City, Negros Oriental para magpundar sang larangan gerilya sang 1998 nangin platon pagtapos sang isa ka tuig.

Ang natukod nga Komiteng Rehiyonal sang PKP sa Negros sadtong Enero-Pebrero 1999 may ara na sang tatlo ka larangan gerilya nga may kabilogan nga katapoon sang Pulang hukbo nga 130. May yunit sa Hukbo nga

gamay nga kompanya kadakuon sang Larangan 1 sa Guihulngan, sobra-platon kadakuon sang Larangan 2 sa erya sang Binalbagan-Himamaylan-Kabankalan-Tayasan-Jimalalud kag platon kadakuon sang Larangan 3 sa erya sang Canlaon City, kag San Carlos kag Don Salvador Benedicto, Negros Occidental. May napundar nga mga organisasyon masa nga may katapoon nga 7,500 kag may kabilogan nga baseng masa nga 37,500. Gilayon gintadlong ang tendensya nga *mag-over reach* (sobra nga pag-inat) paagi sa *leap frog* (paglukso sa layo) nga pagpadala sang iskwad sa erya sang Cauayan-Hinobaan-Ilog-Candoni-Kabankalan-Sipalay (CHICKS erya), Negros Occidental sadtong 1995. Ginpabalik ang ini nga yunit bangud may kadelikadohan nga mawasak bangud sa kadamuon pa sang RPA-ABB sa amu nga lugar.

Ang panawagan para sa mga pwersa sa urban nga magpadeploy sa kaumhan nagresulta sa *pag-full time* sang 78 ka kadre sa kaumhan halin 1994 tubtob 1998 kag nagbaton sang mga hilikuton sa armadong paghimakas. Siling sang pungsodnon nga pamunoan sang Partido, ini ang pinakadaku nga deployment sang mga kadre sa urban pakadto sa kaumhan sa bilog nga Partido sini nga panahon.

Ang amu nga *deployment* halin sa urban kag white area pakadto sa kaumhan nakapadasig sa pagpabaskog liwat sa mga rebolusyonaryong pwersa para sa armadong paghimakas. Sobra 100 ka mga baryo sa 11 ka banwa kag tatlo ka syudad ang nalab-ot sa paghulag sang mga yunit sang Hukbo sa tatlo ka larangan gerilya halin 1994 tubtob 1999.

Apang ang palisiya nga “pasantokon sa hangin ang kaaway” nangin sampihak nga palisiya nga nagduon sa hilikutong masa kag rekoberi nga wala sang taktikal nga opensiba sulod sa anum ka



tuig sukad 1994 tubtob 1999. Gintadlong ini sa tuig 2000 paagi sa paglunsar sang una nga taktikal nga opensiba sa pormang ambus sang kumbinadong pwersa sang seksyon kadakuon nga Regional Strike Force kag yunit sang Larangan 2 batok sa mga CAFGU sa Sityo Namulo I, Brgy. Payao, Binalbagan sadtong Pebrero 2000 nga nagresulta sa pagkapatay sang duha ka CAFGU kag isa ka regular nga suldado, kag pagkapilas sang isa pa. Nakompiska halin sa ila ang apat ka matag-as nga kalibreng armas.

Ang naplastar nga tatlo ka larangan gerilya sa Central Negros nangin *target* sang kampanya sa pagwasak sang kaaway. Namutikan sini ang pagbaskog liwat sang mga rebolusyonaryong pwersa kag natumod ini sa mga espisipikong lugar sa Central Negros. Bangud sini, ginbalik sa Philippine Army halin sa Philippine National Police (PNP) ang responsibilidad sa Internal Security Operations. Sa katapusan nga bahin sang 1998, nag-abot ang 61st Infantry Bat-

talion (IB), 11th IB kag 66th IB nga dugang sa nagaluntad nga 6th Special Forces Battalion, 3rd Scout Ranger Company kag 7th Regional Mobile Group Battalion diri sa isla. Ginkabig sang Oplan Makabayan sang rehimen Estrada ang isla sang Negros bilang isa sa tatlo ka rehiyon nga nyutralisahon ang liwat nagabaskog nga "*local communist movement.*"

Sang 1999 kag 2000, ginlunsar sang 303rd Brigade ang tatlo ka kontra-insurhensya nga kampanya militar batok sa bag-o lang liwat nagbaskog nga Partido Komunista sa isla kag mga yunit sang BHB sa Negros. Nangin *target* sa pagwasak ang pamunoan sang Partido kag ang SDG sang BHB sa rehiyon (RSDG) nga nagresulta sa tatlo ka engkwentrohanay. Apang napaslawan ang kaaway sa tinguha sini.

Ginlantaw sang Partido nga ang tatlo ka magkalapit nga magagmay nga larangan gerilya sa *central* Negros bulnerable nga mawasak sang brigada-kadakuon nga dalagkuan nga pokus kag susteni-

do nga kampanya militar sang kaaway. Nagdesisyon ang Partido nga "inaton ang pokus sang kaaway sa malapad nga lugar paagi sa pagpadala sang ekspansyon yunit sa norte kag sa *southwest* nga bahin sang Negros para malikawan nga mapuruhan sang dalagkuan nga kampanya militar sang kaaway ang mga larangan gerilya sa *central* Negros."

Sa amu nga desisyon, nagmadinalag-on ang pagkapundar sa larangan gerilya sa norte kag sa *southwest* nga bahin sang Negros. Bisan naglapta ang mga larangan gerilya sa layo nga mga lugar sa norte, *central*, *southwest* kag *southeast* nga bahin sang Negros sa tuig 2005 pataas, nakaposisyon naman ini sa mga estratrehikong lugar kag tereyn kag amat-amat nga nagpapas sa impluwensya sang RPA-ABB sa sini nga mga lugar. Samtang ang *southeast* Negros nabuksan liwat bilang lain nga teatro sang gyera sa isla sang Negros paagi sa pagsulod sang yunit sang BHB halin sa lain nga rehiyon.

Engkwentrohanay sa tunga sang RSDG sang BHB batok Philippine Army



- 1** Agosto 15, 1999
Sityo Pinangimnan, Brgy. Trinidad, Guihulngan, Negros Oriental
- 2** Hulyo 2000
Sityo Puting Bato, Brgy. Lag-it, Tayasan, Negros Oriental
- 3** Agosto 2000
Sityo Tahud Lahas, Brgy. Carabalan, Himamaylan City, Negros Occidental

Ang IDKP sa isla sang Negros

Sa tuig 2000 pataas, madamu ang nalunsar nga sustenido kag makahason nga mga gagmay kag dalagku nga taktikal nga opensiba sang BHB sa Negros. Gamit ang tropa nga tim, iskwad, seksyon kag platon kadakuon kag, sa isa ka beses kumpanya kadakuon. Naglunsar ini sang anihilatibo kag atritibo nga mga taktikal nga opensiba sa mga porma nga reyde may lupok, reyde wala lupok, ambus, pagdis-arma, harasment, isnayping, aksyon punitibo kag pagsilot.

Ang gerilya nga pagpakig-away nagakinaiya sa pagpadugo sa kaaway paagi sa libo-libo nga pilas sa lawas kag panagsa nga lampos sa ulo. Ang BHB sa isla sa Negros may isa ka lebel ang naabot sa paglunsar sang mga taktikal nga opensiba nga nagagamit sang pormasyong platon kag kumpanya. Ini ang kadakuon sa tropa nga makapatuman sa papel sang “panagsa nga lampos sa ulo” samtang ang mga tim kag iskwad ang makapatuman sa “libo-libong pilas sa lawas.” Pagkonsentra ini sang superyor nga pwersa batok sa relatibo mahina nga parte sang kaaway kag nagahingalit sa elemento sang surpresa amu nga maseguro ang kadalagan. May signipikante man nga kadamuon sang mga atritibong aksyon nga ginpatuman sa mga tim kag iskwad sang BHB kag yunit milisya ang nagresulta sa pagkakumpiska sa mga armas kag pagpabaskog sa baseng masa.

Ang kaaway estratehikong superyor sa BHB, napulo ka suldado sa isa ka Pulang hangaway, pero ang BHB pwede nga makalabot sang taktikal nga superyoridad batok sa kaaway, napulo ka Pulang hangaway sa isa ka suldado, paagi sa pagkonsentra sang superyor nga pwersa batok sa mahina nga parte sang kaaway sa iya nga mga taktikal nga opensiba.

Mga Sandigan nga Taktikal nga Opensiba (2004-2014)

*Kabilogan nga nakumpiska nga matag-as nga kalibre nga armas: 18
Gingamit nga pwersa sang BHB:
Platon-kadakuon*



- 1** Pebrero 2004
Reyde sa CAFGU detatsment
Brgy. Mahalang, Himamaylan City,
Negros Occidental
- 2** Nobyembre 2007
Reyde sa istasyon sang PNP-La Libertad
La Libertad, Negros Oriental
- 3** Mayo 2013
Ambus batok sa 47th IB
Sityo Samac, Brgy. Camindangan,
Sipalay City, Negros Occidental
- 4** Abril 2014
Ambus batok sa PDT sang Philippine Army
Sityo Madaha, Brgy. Buenavista,
Himamaylan City, Negros Occidental

*Kabilogan nga nakumpiska nga matag-as nga kalibre nga armas: 21
Gingamit nga pwersa sang BHB:
Kompanya-kadakuon*

- 1** Agosto 2010
Reyde sa CAFGU detatsment
Sityo Pulpangyan, Sagay City,
Negros Occidental

Base sa inagihan kag lebel sa kapasidad, makaya sang mga yunit sang BHB nga puntaryahon ang mga relatibo mahina nga mga CAFGU detatsment sulod ukon tamba sa mga larangan gerilya, mga istasyon sang pulis sa mga banwa kag mga armado nga *goons* sa mga kriminal nga sindikato. Gikinahanglan lang nga him-oson ang nagakaigo nga inteledyens kag rekonaysans, maid-id nga pagtuon sa target, paggamit sa elemento sang surpresa kag nagaka-igo nga paghanda lakip ang sige-sige nga paghanas antes ang aktwal nga aksyon. May mga taktikal nga opensiba nga nagmadinalag-on kag nakahakot sang signipikante nga ka-

damuon sang armas.

Sang 2008 tubtob 2010, nangin priority sang mga kontra-insurhensya nga kampanya sang AFP Central Command ang isla sa Negros. Sang 2011 tubtob 2013, nangin kabahin ini sang pungsodnon nga prayoridad sang AFP.

Ang Oplan Daba-daba nga gindihon sang Regional Operational Command sang BHB Negros sa tuig 2011 nakapakibot sa kaaway. Ginkinaiyahan ini sang lapnagon nga mga hasasment, isnaying, aksyon punitibo batok sa mga agalon mayduta, operasyon isparo batok sa mga ispesipikong *target*, ambus sa isa ka kolum sang RMG sa Norte kag pagbutang sang

sobra pito ka “NPA Tsekpoynt” sa lain-lain nga lugar. May 22 ka anihilatibo kag atritibo nga aksyon militar ang nalunsar nga naka-kompiska sang pito ka mataas nga kalibre nga armas kag tatlo ka nugbo nga armas. Nakahatag ang mga ini sang halit sa kaaway sa diin 12 ang patay kag lima ang pilason.


Bilang reaksyon sang kaaway, ginlunsar sini ang todo-larga nga dalagkuan nga mga operasyon militar batok sa tanan nga larangan gerilya sang BHB sa isla nga nagresulta sa paglapta sa mga yunit gerilya sa mas lapad nga mga lugar para makalikaw sa dalagkuan nga hampak sang kaaway.

Porma sang taktikal nga opensiba: Beyd Kabilogan nga nakompiska nga matag-as nga kalibre nga armas: 75 (2002-2015)

- 1** 2002 - batok sa RPA-ABB Brgy. Biao, Binalbagan, Negros Occidental
- 2** 2003 - batok sa RPA-ABB Sta. Catalina, Negros Oriental
- 3** 2004 - batok sa RPA-ABB La Castellana, Negros Occidental
- 4** 2004 - batok sa CAFGU detatsment Brgy. Mahalang, Himamaylan City, Negros Occidental
- 5** 2007 - batok sa PNP-La Libertad La Libertad, Negros Oriental
- 6** Abril 2010 - batok sa mga *security personnel* sang Philex Mining Sitalay City, Negros Occidental
- 7** Agosto 2010 - batok sa CAFGU detatsment Sityo Pulupangyan, Brgy Bug-ang, Toboso, Negros Occidental
- 8** 2011 - batok sa mga *security personnel* sa fishpond ni Sarosa-Maranon Sagay City, Negros Occidental

Porma sang taktikal nga opensiba: Ambus Kabilogan nga nakompiska nga matag-as nga kalibre nga armas: 16 (2009-2016)

- 1** Disyembre 2009 - batok sa 61st IB Sitio Indangawan, Brgy. Manlocahoc, Sitalay City, Negros Occidental
- 2** Mayo 2013 - batok sa 47th IB Sityo Samac, Brgy. Camindangan, Sitalay City, Negros Occidental
- 3** Abril 2014 - batok sa PDT sang Phil. Army Sitio Madaha, Brgy. Buenavista, Himamaylan City, Negros Occidental
- 4** Pebrero 2016 - batok sa Candoni PNP Candoni, Negros Occidental
- 5** Mayo 2016 - batok sa 62nd IB Sityo Carbon, Brgy. San Isidro, Toboso, Negros Occidental





Ang antipyudal nga kahublagan masa

Ang kadalag-an nga naagum sa paghimakas sa duta kaangay sang pagposisyon sa mga duta sang mga agalon mayduta sa norte, *central* kag sur nga bahin sa isla panahon sa dekada '80 nanghina dungan sa paghina sa kusog sang BHB kag sa baseng masa. Bisan signipikante nga bahin sa mga kadutaan sang mga agalon mayduta ang wala na nabalik sa ila, nagbaskog liwat ang ila gahum sa kaumhan kag naghana nga ila agawon balik ang mga duta nga napolisyonan na sang mga mangunguma kag mamumugon sa uma.

Panahon sang IDKP, sa kata-pusan nga bahin sang dekada '90 kag temprano nga bahin sang 2000, sa kahimtangan nga rekoberi ang tum-ok sang hilikuton masa, ginpasulong ang ligal nga paggamit sang Comprehensive Agrarian Reform Program (CARP) ukon pag-aplay sang *petition for coverage* sa mga benepisyaryo sang duta ilabina sa mga duta nga naidalum sa Voluntary Offer to Sell (VOS), Compulsory Acquisition (CA), kag iban pa kag pagduso sang mga *money claims* kag *wage differentials*.

Amat-amat nga naglapnag ang mga antipyudal nga paghimakas sa tanan nga larangan gerilya apang, sa kabilogan, ginagmay, lapta-lapta kag indi koordinado sa banwa nga lebel. Nakalunsar sang paghimakas batok sa pagpang-agaw sang duta, mga paghimakas sa pagpataas sa presyo sang saging, kape kag kopra, kag pagpataas sa bahin sang mangunguma sa produkto sa duta. Partikular sa *North* Negros, ang paghimakas sa *wage differentials* nakaagum sang kadalag-an dira sa desisyon sang Korte Suprema nga kinahanglan ang agalon mayduta magbayad sang Php 1.4 milyon sa mga mamumugon sa uma. Sa *southeast* Negros, ang pagpamatok sa pagpatanom sang jathropa sa Tamlang Valley nakalab-ot sa kinaiya nga intermunisipal nga paghimakas.

Sugod 2008 amat-amat nagbaskog ang paghimakas sa pagpusisyon sa duta nga nagsugod sa Bago City, Negros Occidental tubtob naglapnag sa malapad nga mga asyenda sa Negros. Dugang na-engganyo ang pag-init kag

pagbaskog sa mga pagpusisyon sa duta paagi sa bungkalan sang nagbaskog ang mga taktikal nga opensiba sang BHB sa tuig 2010 kag 2011. Naglab-ot sa 53 ka mga asyenda sa norte, *central* kag sur nga bahin sang Negros ang nasakop sa bungkalan. May 2,317 ektarya ang nasakopan kag 899.39 ektarya ang natamnan sang tubo, humay, mais, saging, mga utanon, mga kararuton kag iban pa. May kabilogan nga benepisyaryo nga 6,012 ka indibidwal sulod sa 1,503 ka bubong.

Ang 53 porsiyento sa mga bungkalan ara sa Escalante City, Negros Occidental kag sa mga dulunan niya sa Sagay City kag Toboso sa pareho nga probinsya. Indi katingalahan nga ang 3rd Civil Military Operations (CMO) Battalion sang kaaway ginbutang sa Escalante City sa tuig 2012 tubtob 2014.

Ang daku nga kadalag-an sa bungkalan amu ang pagtaas sa militansya kag pagtalom sa kamuklatan antipyudal sa masang mangunguma. Ang kampuhan ukon *camp-out* nangin importante nga

komponent sang paghimakas sa pagposisyon sa duta. Nangin eskwelahan ini sa organisado nga paghulag sang mga mangunguma kag mamumugon sa uma dira sa ila paghimakas. Tilipunan ini para sa ila pagdihon sang plano kag pagdihon sang organisado nga mga tikang sa pagpaabanse kag pagdependa sang ila nalab-ot nga mga kadalag-an sa paghimakas. Nangin lugar ini sa paglunsar sang mga pagtuon sa kurso sang Pam-bansa Demokratikong Paaralan (PADEPA) kag mga paghanas sa produksyon, pag-organisa, pag-propaganda kag mga kultural nga aktibidad.

Sang naglawig ang mga bungkalan, amat-amat nagkulpa ang relatibo lapad nga simpatiya kag suporta sa iban nga sektor ilabina sang nahanunga nga pwersa kag pila ka opisyal sa barangay kag banwa. Ang pagsuportahanay sang mga mangunguma sa lain-lain nga asyenda naghina man. Nagtuhaw ang tendensya sang impetusidad kag paghalog sa pagpundar sang mga rekisitos sa paglunsar sang bungkalan. Ini nangin bulnerable sa singki nga reaksyon sang mga dalagku nga agalon mayduta.

Bisan ang bungkalan naggamit sa mga laye sang peke nga CARP, nag-engganyo ini sang singki nga reaksyon sa mga agalon mayduta bangud ginahangkat sini ang ila pagpanag-iya sa duta paagi sa pagpusisyon kag pagpalarga sa bungkalan sang mga mangunguma. Ang pagmasaker sa siyam ka mangunguma nga nagpatigayon sang bungkalan sa Hacienda Nene sa Sagay City sadtong Oktubre 2018 resulta sa sini nga ulihi nga pag-uswag.

Magluwas pa, isa ka bahin nga nakatutok ang antipiyudal nga paghimakas sa bungkalan kag wala mahatagan atensyon ang paghimakas sa pagpataas sweldo sa mga mamumugon sa uma, korapsyon kag pagdumili sa paghatag

sa mga mamumugon sang katubhan sa Social Amelioration Fund (SAF) kag iban pa.

Sa kabilogan, ang mga kadalag-an sang mga taktikal nga opensiba kag antipiyudal nga paghimakas sini nga panahon nagpa-

lapad sa mga organisasyon masa, dugang nakatukod sang mga organo sa gahum pampulitika sa baryo kag nagpasanyog sa impluwensya sa rebolusyonaryong kahublagaan sa malapad nga pumuluyong Negrosanon.

Tion sang singki kag dalagkuan nga mga FMO/RCSP sang AFP

Apang sa panahon sang rehimen Duterte, ginlatag ang basehan sa singki kag dalagkuan nga mga ataki batok sa mga rebolusyonaryong pwersa kag pumuluyo sa bilog nga pungsod kag sa isla sang Negros. Ginkansela sang rehimen Duterte ang Negosasyon sa Kalinong sa tunga sang Government of the Republic of the Philippines (GRP) kag National Democratic Front of the Philippines (NDFP) sadtong Nobyembre 2017. Gindeklara ini nga teroristang organisasyon ang PKP kag BHB sadtong Disyembre 2017 kag nagpakanaug sang Memorandum Order 32 sa rehiyon sang Bikol kag mga isla sang Samar kag Negros. Nagpakanaug man sang Executive Order 70 nga nagtukod sa National Task Force (NTF)-Elcac para sa *whole of nation approach* nga magserbi sa pagpasingki sang ila kontra-insurhensya nga kampanya batok sa rebolusyonaryong kahublagaan sa bilog nga pungsod.

Paagi sa Joint Task Force-Kapanatagan kag NTF-Elcac, ginpamunoan ni Duterte, upod ang mga mataas nga opisyal sang militar kag mga retirado nga heneral, ang pagmobilisa sa bilog nga AFP-PNP-CAFGU, tanan nga mga sibilyan nga ahensya sang gobyerno, mga pribadong sektor sa negosyo, institusyon kag mga organisasyon kag personalidad para ihamulag kag wasakon ang mga rebolusyonaryong pwersa. Ginmando ni Duterte ang todo-larga kag dalagkuan nga operasyon militar kag kontrakomunista kag itom nga propaganda sa tuman nga pagpakalain sa PKP, BHB kag NDFP apil ang mga ligal kag progresibo nga mga organisasyon, personalidad kag mga oposisyon.

Manipestasyon sang todo-larga nga pasismo sang berdugo nga rehimen ni Duterte sa isla sang Negros ang malaparan kag hayagan nga pag-ataki sang 79th IB kag 6th Special Action Force Battalion (6SAF) sa Brgy. Washington, Escalante City sadtong Nobyembre 2018, ang maduguon nga Oplan Sauron 1 & 2 sang AFP/PNP sadtong Disyembre 2018 kag Marso 2019, kag ang malaparan nga *joint operation* sang AFP/PNP sa Canlaon City, Guihulngan City, Manjuyod, Bindoy, Sta. Catalina sa Negros Oriental diin sobra 25 ka persona ang ginpatay kag masobra 50 ang ginaresto.

Ang mga larangan gerilya sa Negros nga relatibo gagmay pa kumpara sa kadakuon sang kaaway nga ari sa isla, nangin bulnerable sa dalagkuan kag singki nga mga operasyon militar sa kaaway. Ang tanan nga mga larangan gerilya sugod 2019 tubtob 2022, sostenido nga ginlunsaran sang mga *focused military operation* (FMO) kag Retooled Community Support Program (RCSP) sa lain-lain nga lebel, sa pinakamenos isa tubtob duha ka batalyon sang kaaway sa isa ka panahon.

Mga disenyo sang kontrarebolusyonaryo nga opensiba sang AFP

Large-scale force deployment - dugangan sang kaaway ang nagligad nga lebel sang konsentrasyon sang ila pasista nga tropa sa mga gintalana nila nga prayoridad nga erya sang BHB.

Operations in-depth - nakapwesto ang mga sentro sang kumand sang mga batalyon sang AFP sa sulod mismo sang mga larangan gerilya kag nahamtang ang ila mga kumpanya sa kasikbit nga bahin sang pokus nga erya, may sustenido nga dalagku nga operasyon kombinasyon sang malapad nga mga operasyon RCSP, operasyon istrayk sa mga sentro de grabidad sang rebolusyonaryo nga kahublagan sa erya kag paglagas sang desaysibo nga away batok sa mga yunit sang BHB.

Gradual constriction - nagatinguha nga himuon nga kitid ang erya para sa maniobra sang BHB nga daw amat-amat nga ginakuga. Amu ini ang konsepto kag pamaagi sang *win-hold-win* kag permi nga galagas ang kaaway sang desyasibo nga away batok sa mga yunit sang BHB.

Blockhouse warfare - paisa-isa nga pagpokus sa mga larangan gerilya kag pag-*hold* sa matapos na nga bahin.

Venus flytrap - Pag-atake sa tunga agud matiklod ang mga yunit sang BHB pakadto sa siod nga indi masyado ka bakud nga bahin sang erya kon diin naplastar ang lambat paniktik sang kaaway kag handa na ang ila mga pwersa nga pang-atake kag panglagas. Mahimo nga ginhungod nga menos ang operasyon sang AFP sa ila ginhandang lugar agud didto mag-atras kag makahon ang gintabog nga pwersa sang BHB.

Heartland attack - Dumog sang pwersa kag atake sang kaaway sa ila ginkilala nga pinakasolido nga bahin sang pokus nga erya.

Full force support sang mga moderno nga kagamitan militar - Lakip sini ang paggamit sang mga *attack* kag *surveillance drone*, mga *scout* kag *attack helicopter*, eroplano nga pangbomba, kanyon kag Armored Personnel Carrier. Sa subong, nagagamit sang *drone* sa lebel sang batalyon para sa ila mga taktikal nga operasyon.

Nakaagum sang signipikante nga kahalitan ang BHB atubang sa kumplikado kag singki nga mga FMO/RCSP sang kaaway. Nahingalitan sang kaaway ang pagluntad sa mga seryoso nga kahinaan kag sayop sa pila ka yunit sang BHB pareho sang pagtenir sa markado nga mga lugar, paghalog sa disiplinina sa pagsulundan militar, wala paggwa sa kahon sang ginlunsaran sang FMO/RCSP sang kaaway, indi pagseryoso sa na-oberbahan nga indikasyon sa peligro sa seguridad, kag ang kakulang sa madalum nga pagtuon sa nagaluntad nga kahimangan militar.

Nagpaandam na ang Partido sa disenyo sang kontrarebolusyonaryo nga opensiba sang kaaway.

May *large-scale force deployment*, *operations in-depth*, *gradual constriction*, *blockhouse warfare*, *venus flytrap*, *heartland attack*, malaparan nga operasyon RCSP, *full force support* sa mga modernong kagamitan militar para ayudahan ang mga dalagkuan kag singki nga operasyon sang pasistang AFP kag PNP.

Bisan pa sa dalagkuan kag sustenido nga FMO/RCSP sang mga tropa sang 303rd kag 302nd Brigade sang AFP kag mga batalyon sang SAF kag RMF sang PNP sa tanan nga mga larangan gerilya sang BHB, nahampang gihapon sang BHB ang inisyatiba sa paglunsar sang mga taktikal nga opensiba nga pleksible nga nag-

gamit sang tim, iskwad, platon kag *over-sized* platon nga nakakumpiska sang pila ka matag-as nga kalibre nga armas kag madamu nga mga nugbo nga armas, bala kag iban pa nga kagamitan militar.

Nalunsar gani sang BHB Negros ang apat ka kontrakampanya sa tatlo ka larangan gerilya sadtong ikaduha nga bahin sang 2020 kag una nga bahin sang 2021 nga nakahalit sa kaaway kag nakapreserba sa BHB. Dugang pa, padayon nga napalapad ang mga erya nga nakober sang mga larangan gerilya. Nagapangalipay ang mga masa sa mga bag-o nga lugar nga nabalikan matapos sa pila ka dekada nga wala na sila makakita sang Pulang hukbo.

Mga hangkat nga atubangon kag mga hilikuton nga gilayon nga tungdan

Subong ang isla sang Negros isa sa pungsodnon nga prayoridad para sa paglunsar sang mga dalagku kag bayolente nga kampanya kontrarebolusyonaryo sang AFP kag PNP. Ginagamit sini ang pagpatay kay Gob. Roel Degamo bilang rason agud mas pasingkion ang operasyon militar sa isla paagi sa pagdugang sa 47th IB kag 50 ka tropa sang Light Reaction Company. Nagapalapnag man ini sang makinaryas sang pagpaniplang agud hinabonan ang ila paslaw nga kampanya kag ipalapta ang naratibo nga “pagdaog sa gyera batok sa rebolusyonaryong kahublagaan.”

Ang makasiligni nga kontrarebolusyonaryo nga gyera sang AFP kag PNP magaserbi sa interes sang lokal nga nagahari nga sahi. Sa nagahana nga implementasyon sang Negros Island Region, nagapaindisanay ang nagahari nga sahi halin sa duha ka probinsya sang Negros para sa dominasyon. Apang, bakud ang ila nga paghiliusa kontra sa rebolusyonaryong kahublagaan nga amu ang pinakabaskog nga upang sa ila interes sa isla.

Tinutuyo sang mga dalagku kag bayolente nga operasyon militar nga pahipuson kag ibilin nga ginagapos ang masang Negrosanon sa *monocrop* nga industriya sang kalamay. Nagalala ang kahimtangan sang mamumugon sa kampo sa manubo nga sweldo (kalabanan P250 ang inadlaw) samtang nagasirit ang presyo sang sandigan nga balaklon. Lapnagon man ang kontraktwalisasyon sa mga asyenda kag sentrales. Dugang pa ang pag-antus sang pumuluyong Negrosanon sa mga *neoliberal* nga palisiya kag mga proyekto sang dumuluong nga kapitalista kag dalagku nga komprador burgesya kaangay sang importasyon sang kalamay kag bugas, pribatisasyon sang tubig, kuryente kag

transportasyon, deregulasyon sang gatong, kag konbersyon sang mga uma kag palangisdaan pakadto sa komersyal nga gamit nga kalabanan ginhimo nga mga *economic zones*, *real estate* kag eko-turismo.

Ang sosyo-ekonomiko nga kahimtangan sa isla sang Negros matambok nga duta para sa dugang nga pagtubo sang rebolusyon. Dapat handa ang mga rebolusyonaryong pwersa ilabi na ang BHB sa pag-atubang sa mga hangkat karon kag pagtungod sa mga gilayon nga mga hilikuton.

1 Kinahanglan nga ang teorya kag praktika hugot nga magkaangtanay. Magkabanggi ini sila apang naghiliusa sa wala untat nga proseso sa paghulag. Ang teorya matransporma sa praktika sa mas taas nga lebel samtang ang praktika matransporma sa teorya sa lain taas nga lebel. Ang ilang pagkumbina wala untat; ang daan madula kag may bag-o nga magtuhaw. Ang mga problema sa gyera nagakakumplikado kag naga-uswag; wala untat ang paghulag.

Kinahanglan ang aton mga kadre militar magtuon sa dalom nga pagpamensar para bisan sa amat-amat kag mainantuson nga paagi husto nga matun-an kag masolbar ang mga problema sang aton ginalunsar nga inaway banwa. Kon talom ang pag-obserbar naton sa nagalungtad nga mga bagay kag sitwasyon, kon ang aton pamensaron nagasanto ukon lapit nga nagasanto sa mga obhetibong kondisyon, mangin husto ang aton mga tikang sa pagsulbar sa nagalungtad nga mga problema. Ang mga prinsipyo kag ideya nagasalamain sa nagahulag nga obhetibong mga bagay gwa sa utok sa tawo kag ini nga mga bagay indi makita sa mata. Mahangpan lang ang mga ini paagi sa dalom nga pagpamensar. Wala sang iban nga paagi.



Pangibabawan ang mekanikal kag emperisista nga metodo sa pagtuon kag pagsolbar sa mga problema sang aton partikular nga rebolusyonaryong gyera. Magtuon sa rebolusyonaryong teorya para maayong maaplikar ini sa kongkretong kahimtangan kag praktika. Gamiton ang Marxismo-Leninismo-Maoismo, ang diyalektika, ang laye sang kontradiksyon sa pagsulong sang aton inaway banwa sa matinugahon nga paagi.

Importante nga maayo kita sa pagtuon sa mga positibo kag negatibo nga leksyon sang aton inaghan kag komprontahon kag resolbahon ang nagalungtad nga mga sayop kag kahuyangan. Wala untat nga kilalahon ang kaaway kag ang aton kaugalingon, kag patalumon ang paghangop sa mga laye sang aton inaway banwa kag sa pakig-away gerilya sa subong nga halintang sang estratehikong dependensiba. Hatagan man sang taas nga importansya ang mga patakaran kag pagpaathag sang Partido nga napanahon nga ginpagwa.

2 Padayon nga isulong ang lapnagon kag sunson nga pakig-away gerilya base sa nagalapad kag nagadalom nga baseng masa. Pamatokan ang nagalungtad nga sulog sang konserbatismong militar sa mga yunit sang BHB sa rehiyon kag sa mga larangan gerilya. Ipataas ang determinasyon, kakayahan kag kaisog sa mga kumand sang BHB sa lain-lain nga lebel sa pagpalarga sa inisyatiba kag pleksibilidad, sa maayo nga pagplano, pagdumala kag koordinasyon sa lain-lain nga yunit. Hangkat sa mga Pulang kumander kag mga hangaway sa BHB ang pagpauswag sa kakayahan sa pagpakig-away, sa taktika kag teknika sa lain-lain nga tipo sang mga anihilatibo kag atritibong mga taktikal nga opensiba.

Mangin handa sa dugang pa nga mga kabudlayan kag sakripisyo. Ipataas ang determinasyon sang mga rebolusyonaryong pwersa nga ubos-kaya nga paslawon ang plano sa pasistang rehimen ni Marcos II nga wasakon ang mga rebolusyonaryong pwersa sining ikaduha nga tuig sang iya termino.

Ilunsar ang mga kontra-kampanya sa rehiyon kag mga larangan gerilya batok sa kampanya sang kaaway. Ang FMO

kag RCSP sang AFP masarangan nga paslawon sa mga yunit sang BHB. Ang kampanya sang mga solido nga sandigan nga taktikal nga opensiba sang BHB nga makapapas sa kaaway ang pinaka-pektibo nga pamaagi sa pagkompronta sa mga FMO. Masarangan sila nga hanotan sang dalagku nga halit sang BHB paagi sa suporta sang masa, pagpili sang paborable nga tereyn, pagpamilyarisa sa mga ruta kag padron sang ila sulodgwa, paggamit sang superyor nga pwersa sang BHB relatibo sa target, maayo nga paggamit sang mga *command-detonated explosives* kag husto nga tiempo sa diin lapyo na ang mga tropa sang kaaway sa pila na ka adlaw nga operasyon. Kumbinahon ini sang serye sang mga atritibong aksyon militar batok sa nagahulag nga dalagku nga tropa sang kaaway, sa ila mga linya sa komunikasyon, transportasyon kag suplay kag iban pa.

Ang mga kontrakampanya makapamanggad sa BHB sa iya inagihan sa pagpakig-away; makapauswag sa kakayahan sa kumand kag koordinasyon, sa paniktik, pagplano kag operasyon; sa taktika kag teknika; kag makapataas sa pangkombat nga kakayahan sa

mga yunit gerilya sang BHB.

Para epektibo nga maatubang sang BHB ang dalagkuan kag singki nga kontrarebolusyonaryo nga kampanya sang AFP kag PNP, ang kondukta sa paghulag sini kinahanglan may hugot nga paguyat sa prinsipyo sa estruktura sa pwersa. Relatibo nga konsentrasyon sa nangunang yunit, relatibo nga dispersal sa mga sekundaryong yunit kag positibo nga korelasyon sa mga yunit para sa koordinasyon, pagbuligay kag pagsuportahanay sa pagpatuman sa mga hilikuton ilabi na sa taktikal nga opensiba. Paagi sini, hugot mauyatan ang inisyatiba atubang sa nagaataki nga kaaway kag mapangibabawan ang pagkupasibo sa kahimtangan nga ang kaaway superyor sa kadamuon sa tropa, sa kagamitang militar, sa *training*, iban pa.

Para mauyatan ang inisyatiba, pleksible nga maggamit sang tim, iskwad, platun kag kumpanya sa paglunsar sang taktikal nga opensiba. Magkonsentra sa paglunsar sang mga anihilatibong taktikal nga opensiba, magdispers para sa hilikuton masa, propaganda, pagorganisa kag mag-saylo para makalikaw sa dalagku nga hanot sang kaaway ukon para



sa iban naman nga hilikuton sa iban nga erya. Magpakamaayo sa gerilya nga taktika sa pagkonsentra, pagdispers kag pagsaylo nga magasanto sa nagalungtad nga kahimtangan sa kabilogan nga lugar.

Sa kahimtangan nga ginapa-uswag pa naton ang nagakaigo nga estruktura sa pwersa kag may lain-lain nga lebel ang mga larangan gerilya sa isla, magtalana sang nagapanguna nga yunit kag may mga sekundaryo nga yunit. Ang nagapanguna nga yunit dapat ara sa relatibo nga konsentrasyon kag ang mga sekundaryo nga yunit ara sa relatibo nga dispersal nga may kabilogan nga positibong korelasyon sa nagahulag nga mga yunit para sa koordinasyon, pagbuligay kag pagsuportahanay inkaso may matabo nga wala makonsidera sa dalagan sa pagpatuman sa mga hilikuton kag pag-atubang sa nagaataki nga kaaway.

Ang positibo nga korelasyon sa mga yunit sang BHB magbunga sang relatibo mataas nga lebel sang inisyatiba kag pleksibilidad. Bisan sa nubo nga panahon, makatuga ini sang taktikal nga superyoridad batok sa kaaway. Bisan ano ka nubo ang taktikal nga superyoridad kun husto nga magamit, daku na nga bagay para sa BHB nga sa kabilogan imperyor kag ang kaaway superyor sa estratehiya.

Ang kaaway man indi permi nakakonsentra sa dalagku nga kolum. Ma-obliga man sila nga magdispers sa lain-lain nga magamay nga kolum bangud sa mabudlay nga tereyn sa isla sang Negros. Diri patuhawon ang pagkamakahason kag pagkamatugahon sang mga kumander kag katapoan sa mga yunit sang BHB. Indi magtuhaw ang positibo nga korelasyon sa mga absoluto nga nakadispers nga mga yunit sang BHB. Indi man buot singganon nga may positibo nga korelasyon sa sobra nga nakakonsentra ukon lawig nga nagkonsentra nga daku



nga yunit. Ang pagkasignipikante ara sa relatibo nga konsentrasyon sa nanguna nga yunit kag relatibo nga dispersal sa mga sekundaryo nga yunit. Ang inisyatiba kag pleksibilidad daku nga hambalanon sa kondukta sa rebolusyonaryong Hukbo dira sa pagpa-uswag sa kaugalingon halin sa gamay kag mahina pakadto sa pagdaku kag pagbaskog. Ang pasibidad magdala sa Hukbo sa banggi nga direksyon.

Sa ini man nga paagi madasig ang pagdebelopar sang mga bag-o nga kadre militar ilabina sa hanay sang mga pamatan-on nga katapu sang BHB nga may potensyal. Wala sang human-na-daan nga mga opisyal militar. Yara lang sa palibot ang mga materyales nga pwede mapa-uswag. Sa mga relatibo nakadispers nga mga yunit, pwede nga hatagan sang taktikal nga responsibilidad ang mga pamatan-on nga may potensyal nga mangin lider militar. Ini lang kag wala na sang iban nga paagi ang pagpanday sang mga bag-o nga henerasyon sang mga kadre para mamuno kag magkuha sang responsibilidad sa lain-lain nga lebel.

Kinahanglan man mag-employ sang semi-ligal nga mga tim sa mga lugar nga indi pa kaya nga lab-oton sa mga yunit sang BHB para sa dugang pa nga pagpa-

dasig sa paglab-ot sa mas malapad nga lugar.

3 Pataason ang pagtinguha sa lapnagon nga pagpukaw, pagorganisa kag pagpahulag sa malapad nga masa. Isulong ang malaparan nga pagpamatok sa militarisasyon sa kaumahan, sa madamu nga paglapak sa tawhanon nga kinamatarung kaangay sang pagpamomba nga nakapakugmat sa pumuluyo, pagpamugos nga magsurender bilang katapu sang BHB ukon tagasuporta sini, grabe nga pagpamahug, ekstrahudisyal nga pagpamatay, pagkontrol sa hulag sang mga mangunguma nga may epekto sa ila pangabuhian, kag pagtenir sa mga pamalay sang masa, barangay hall, simbahan kag eskwelahan nga nagabayolar sa internasyunal nga makitawhanon nga laye kag tawhanon nga kinamatarung.

Malaparan nga ibuwelo ang pagpukaw, pagorganisa kag pagmobilisa sa mga mamumugon, mamumugon sa uma, mala-proletaryado, mga mangunguma para magdemanda sa pagpataas sang sweldo kag paghatag sang mga benepisyo atubang sa wala untat nga pagtaas sa presyo sang gatong kag sa mga sandigan nga balaklon.

Ang magalanog-lanog kag madinalag-on nga mga taktikal nga opensiba sang BHB magahatag inspirasyon sa pumuluyong Negrosanon kag dugang mag-engganyo sa ila nga magsuporta kag direktang magpartisipar sa pagpasulong sa rebolusyonaryo nga armadong paghimakas. Magahatag man ini sang inspirasyon kag magengganyo sa mga mamumugon, mangunguma, mamumugon sa uma, imol sa syudad, mga drayber sa jeepney, mangingisda, petiburgesya sa lungsod nga maglunsar sang lain-lain nga porma sang paghimakas para isulong ang ila

mga ekonomiko kag demokratiko nga mga demanda batok sa paghimulos kag pagpamigos sa mga reaksyonaryong nagahari nga dalagkung negosyante-kumprador, dalagku nga agalon mayduta-asendero kag dalagku nga buruk-rata-militar sa isla.

Paagi sa pagpasingki sa armadong paghimakas, pagpabaskog sa rebolusyon agraryo kag padayon nga pagtukod kag pagpabakud sa mga organo sang gahum pampulitika sa isla sa Negros, mapabaskog ang mga rebolusyonaryong pwera kag dugang mapalapad ang nagahiliugyon nga prente

batok sa reaksyonaryong kaway sa tunga sang nagalala nga krisis sang malakolonyal kag malapyudal nga reaksyonaryong sistema sa pungsod kag sa krisis sa pangkalibutan nga sistema sang kapitalismo.

**Mabuhi ang Bag-o nga Hangaway sang Banwa!
Mabuhi ang Partido Komunista sa Pilipinas!
Mabuhi ang naghimakas nga pumuluyong Negrosanon!** **AP**

